

Minister Michelle Hooyboer-Winklaar:

Ta bunita pa mira con festival di Himno y Bandera a crece asina hopi

ORANJESTAD - E festival un canto pa Aruba su Himno y Bandera 2013 un biaha mas tabata hopi exitoso. Minister di Asuntunan Economico, Asuntunan Social y Cultura, Michelle Hooyboer-Winklaar ta masha contento con esaki a bay y di por a mira un bunita participacion.

E mandatario a resalta e trabao di e organisadonan y banda di esaki tabata hopi satisfecho pa e hecho cu por ripara cu mas y mas hende ta participa y ta apoya nos artistanan local. "Esey ta debi na e pasion cu cual nan ta haci e sigur, e interes den e festival y di esunnan cu ta participa", el a bisa.

Esaki ta e luna nacional ya caba esaki ta yena cu hopi actividad cultural. "Esaki ta manera un cherry ariba e bolo y ta hopi bunita pa wak un festival cu a crece asina hopi", Minister Hooyboer-Winklaar a expresa.

El a agrega cu esaki ta un festival cultural, pero sigur cu enfoca ariba e parti di canto. "Algo sumamente bunita cu nos a disfruta di dje".

Banda di esaki, Harry Croes, organizado di e festival a expresa cu e festival tabata tin un nivel masha halto. Den su opinion un di e miho nan cu por a mira pa loke ta nivel, publico, e expresion cu ta sali di e curason di cada cantante. Tabata cuatro dia caminda a traha basta duro, pero ta keda e satisfaccion di e resultado, Croes a manifesta.

Esaki ta e di 18 aña di e festival Un canto pa Aruba su Himno y Bandera y e aña aki e ganado a resulta un duo (Mitch Almary y Maya Marin) cu ta un mescla di un Arubiano y un Venezolano. E publico a acepta esaki y e cancion "Curason" a touch tur hende.

Segun Harry Croes, pa otro aña por spera cierto cambionan. Tin algun cos cu mester wordo drecha. E luga ta bon y nan lo keda mantene



e hecho cu no ta cobra pa entrada. "Pueblo a realisa cu nos no por cobra. Porta mester ta habri".

E satisfaccion pa loke ta e festival aki ta uno hopi grandi y sigur Minister Hooyboer-Winklaar lo sigui apoya cu

alkier tipo di evento cu tin como meta engrandece nos cultura. Riba e combinacion di foto por tira un bista di e

festival y tambe entregamento di premio efectua pa Minister Hooyboer-Winklaar na e ganadonan di e festival. □